

आकाशवाणी जयपुर—अजमेर
प्रादेशिक समाचार

दिनांक 19.04.2024

समय: 18.50 बजे

- लोकसभा चुनाव रा पैला दौर मांय आज प्रदेश रा बारह संसदीय हलकां मांय शांति सागे वोट पड्या—114 उम्मीदवारां रा सियासी भाग रो फ़ैसला ईवीएम मांय बंद।
- लोकसभा चुनाव रा दूजा दौर रा तैत प्रदेश रा 13 संसदीय हलका मांय न्यारी—न्यारी सियासी पार्टियां री ओर ऊं जोर—शोर ऊं प्रचार कर्यो जा रह्यो है।
- राज्य मांय लोकसभा चुनाव रा दूजा अर आखिरी दौर सारू वोट देवण बाबत् जाग जगावण सारू मतदाता जागरूकता कार्यक्रम राख्या जा रह्या है।
- प्रदेश मांय गर्मी रो असर तेज व्हेवण लाग्यो—ऊगणी हलका मांय पारो चढ्यो।

000

लोकसभा चुनाव रा पैला दौर रा तैत प्रदेश रा बारह संसदीय हलकां मांय शांति सागे वोट पड्या। निर्वाचन विभाग ऊं मिली जाणकारी रे मुजब सिंज्यां 05 बज्यां ताई 50 दशमलव 87 फ़ीसदी मतदाता वोट देवण रो हक इस्तेमाल कर लीनो हो। आं मांय शून्य दशमलव 62 फ़ीसदी डाक मत्र पत्र ई शामिल है। सिंज्यां 05:00 बज्यां ताई मतदान केन्द्रा माथे पड्या वोटों मांय सब ऊं बत्ता 60 दशमलव 29 फ़ीसदी वोट गंगानगर सीट माथे पड्या हा। बीकानेर मांय 48 दशमलव 87, चूरू मांय 56 दशमलव 52, झुन्झुनू मांय 44 दशमलव 97, सीकर मांय 48 दशमलव 85, जयपुर ग्रामीण मांय 48 दशमलव 67, जयपुर मांय 56 दशमलव 57, अलवर मांय 53 दशमलव 31, भरतपुर मांय 45 दशमलव 48, करौली—धौलपुर मांय 42 दशमलव 53, दौसा मांय 45 दशमलव 63 अर नागौर मांय 49 दशमलव 92

फीसदी वोट पड़बा रा समाचार है। वोट देवण री मियाद सिंज्यां 06.00 बज्यां ताई जो लोग संबंधित मतदान केंद्र माथे लेण मांय लाग ग्या हा, वां रा वोट दिरावण रो प्रावधान है, ई कारण मतदान प्रतिशत मांय बधोतरी रा आसार है। पैली दफा वोट देवण रा पात्र मतदातावां मांय ई उमाव निजर आयो। चूरु रा बूथ संख्या 104 माथे 18 साल री सायमा पहली दफा वोट दीनो। जिला रा बूथ संख्या 103 माथे नुवा मतदाता सायल खान ने ई पहली दफा वोट दियां पाछे मतदाता प्रमाण पत्र दे र नवाजी ज्यो। वोट देवण सारु आवण वाळा मतदान केन्द्रां माथे बणायी ज्या सेल्फी बूथ सामी फोटो खींच र आं लम्हां ने यादगार बणायो। श्रीगंगानगर मांय जिला निर्वाचन अधिकारी पहली बार वोट देवण वाळां ने प्रमाण-पत्र दे र वां रो उमाव बधायो। वठे वोट देवण वाळा पहला पांच मतदातावां ने पौधा दिया ज्या। हनुमानगढ़ जिला रा रावतसर मांय ब्याह पाछे बींदणी खुशबू शर्मा विदाई ऊं पैली वोट दीनो। हनुमानगढ़ री रहवासी प्रियंका बिश्नोई पहली दफा वोट देवण परां घणी खुशी जतायी।

आई.आई.टी. जोधपुर मांय पढ रह्या डीग रा कौस्तुभ शर्मा वोट देवण सारु जोधपुर ऊं डीग पूग्या अर पहली दफा वोट दे र खुशी जतायी। कोटपुतली री मुक्ता अरोड़ा पहली दफा वोट दियां पाछे सगळा नौजवानां ऊं लोकतंत्र रा महापर्व मांय भागीदारी करण री अपील कीनी। हनुमानगढ़ टाउन री सरकारी स्कूल मांय बणायी ज्या हरित बूथ ने हर्या फूंकणा ऊं सजायी ज्यो। घर ऊं वोट देवण रा सुबीता रे बावजूद ई केई बुजुर्ग अर दिव्यांग मतदाता मतदान केन्द्र माथे पूग र वोट दीना। करौली-धौलपुर लोकसभा हलका मांय खेड़ली रा एक मतदान केन्द्र माथे एक सौ छः साल री धनबाई वोट दीनो। नीमकाथाना मांय चौबीस साल रा दिव्यांग मतदाता आशीष मतदान केन्द्र माथे पूग र वोट दीनो। गंगानगर रा दिव्यांग मतदाता सतीश कच्छावा इलेक्ट्रॉनिक व्हील चेयर रे मार्फत मतदान केन्द्र ताई पूग र वोट दीनो।

हनुमानगढ़ में ट्रंसजेंडर मैना बाई ने मतदान किया। उन्होंने सभी से मतदान करने की अपील की।

न्यारी—न्यारी सियासी पार्टियां रा नेता अर उम्मीदवार ई वोट दियां पाछे खुशी रो इजहार कीनो। दूजा देशां मांय रेहवण वाळा भारत रा पात्र मतदाता ई वोट देवण सारू आया। उंगली माथे लाग्योड़ी वोट देवण री निशाणी वाळी स्याही बतावण परां न्यारी—न्यारी ठौड़ां कारोबारियां री ओर ऊं भांत—भांत री रियायतां दी जा रही है।

लोकसभा चुणाव रा पैला दौर रा तैत प्रदेश मांय अढाई करोड़ ऊं बत्ता पंजीकृत मतदातावां सारू 24 हजार 370 मतदान केन्द्र बणायी ज्या , ज्यां मांय ऊं 12 हजार 660 मतदान केन्द्रां माथे चुणाव प्रक्रिया री लाइव वेबकास्टिंग करी ज्यी। लोकसभा चुणाव रा ई दौर मांय 114 उम्मीदवारां रा सियासी भाग रो फैसलो व्हेला। आं मांय ऊं 102 पुरुष अर 12 महिला उम्मीदवार है। 49 निर्दलीय उम्मीदवार ई किस्मत आजमा रह्या है। जयपुर ग्रामीण लोकसभा हलका मांय सब ऊं बत्ता 15 अर करौली—धौलपुर हलका मांय सब ऊं कम चार उम्मीदवार चुणाव मैदान मांय है।

000

लोकसभा चुनाव रा दूजा दौर मांय प्रदेश री 13 सीटां माथे पडबा वाळा वोटों सारू सियासी पार्टियां री ओर ऊं जोर—शोर ऊं प्रचार कर्यो जा रह्यो है। भारतीय जनता पार्टी रा आला नेता अर गृहमंत्री अमित शाह भोपालगढ मांय जनसभा ने संबोधित कीनी।

वां रो उदयपुर मांय रोड़ शो करण रो ई कार्यक्रम है। हरियाणा रा मुख्यमंत्री नायब सिंह सैनी आज बालोतरा मांय जनसभा कीनी। दूजी कानी राज्य रा पैली वाळा उपमुख्यमंत्री अर कांग्रेस रा स्टार प्रचारक सचिन पायलट आज टोंक—सवाईमाधोपुर सीट ऊं पार्टी रा उम्मीदवार री हिमायत मांय जनसभा कीनी।

000

प्रदेश मांय लोकसभा चुनाव रा दूजा सारू प्रशासनिक तैयारियां ई जोर—शोर ऊं चाल रही है। भीलवाड़ा मांय जिला निर्वाचन अधिकारी नमित मेहता पोलिंग पार्टियां री सिखावण रा कार्यक्रम रो जायजो लीनो। वे सेठ मुरलीधर मानसिंहका राजकीय उच्च माध्यमकि विद्यालय मांय पीठासीन अधिकारियां अर मतदान अधिकारियां री सिखावण सारू लगायी ज्या शिविरां रो दौरा कर र सगळा ऊं जिम्मेदारी सागे काम करण बाबत्

कह्यो। बूंदी रा सरकारी कॉलेज मांय मतदान अधिकारियां रो दूजो सिखावण शिविर पूरो व्हयो। ई पाछे अ सगळा गूगल लिंक रे मार्फत परीक्षा दीनी। ई दौरान सगळा कर्मचारियां ने ईवीएम रा बारा मांय व्यावहारिक सिखावण ई दीरीजी।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है अजमेर जिला रा नासिर मोहम्मद मदनी रो संदेश-

000

फलौदी रा जिला निर्वाचन अधिकारी हरजी लाल अटल जनता ऊं वोट देवण री तारीख 26 अप्रैल ने वोट देवण सारु जरूर जावण री अपील कीनी है।

ई बीच चूरु री जिला निर्वाचन अधिकारी पुष्पा सत्यानी तारानगर रा बीसीएमओ समेत दो कर्मचारियां ने चुणाव रा काम मांय लापरवाही करण रा आरोप मांय मुअत्तल करण रा हुकम दीना है।

000

राज्य मांय लोकसभा चुनाव रा दूजा दौर रा तैत 26 अप्रैल ने 13 संसदीय हलकां मांय वोट पडेल। वोट देवण बाबत् जाग जगावण सारु लगातार कार्यक्रम राख्या जा रह्या है। जोधपुर रा सिवांची गेट हलका मांय न्यारा-न्यारा कार्यक्रम राख र वोट देवण रा महत्त्व री जाणकारी दीरीजी। वठे वोट देवण रा पात्र लोगां री मदद सारु वोटर हेल्पलाइन एप, सी-विजिल एप, केवाईसी अर सक्षम एप रा बारा मांय ई जाणकारी दीरीजी। बूंदी मांय न्यारा-न्यारा प्रकोष्ठां मांय तैनात अहलकार अर कर्मचारी मतदाता जागरुकता रैली निकाली। ई बीच काल सतरंगी सप्ताह रा तहत हर्या रंग री थीम माथे **हम भी सक्षम-राष्ट्र भी सक्षम** नारा सागे ट्राईसाईकिल रैली निकाली जावेला।

000

सवाईमाधोपुर रेलवे अस्पताल मांय आज देशी ईलाज सारू आयुर्वेदिक चिकित्सा शिविर लगायी ज्यो। इण मांय रेलवे रा कर्मचारियां, पेंशन लेवण वाळां अर वां रा पिरवार वाळां रो ईलाज करी ज्यो। शिविर मांय 40 ऊं बत्ता मरीज ईलाज करायो।

000

प्रदेश मांय गर्मी रो असर ओजू बधबा लाग्यो है। ऊगणी हलकां मांय पारो चढ्यो है। लारला 24 घंटां मांय कोटा मांय सब ऊं बत्तो 42 दशमलव 6 डिग्री सेल्सियस तापमान दर्ज करी ज्यो। धौलपुर मांय ई पारो 41 डिग्री सेल्सियस ने पार कर ग्यो। मौसम विभाग रे मुजब आज बीकानेर अर जयपुर संभाग मांय बादळा मण्डया रेहवेला, जद के उत्तरी हलकां मांय हल्की बूदाबांदी री संभावना है। आवता दिनां घणखर हलकां मांय मौसम शुष्क रेहवण रा आसार है। हालांकि उत्तर-पश्चिम राजस्थान मांय 21-22 अप्रैल ने हल्की बूदाबांदी री संभावना है।

000